


INATSISARTUT OQARTUSSAAQATAANERLU

Inatsisartutigoortumik innuttaasut
oqartusaaqataanerat pillugu

- meeqqanut



INATSISARTUT



Oqaluttuaq filminngorlugu ugguuna aamma takusinnaavat:

www.ina.gl/meeqqat


Inatsisartut Allattoqarfiannit saqqummersinneqartoq
Januar 2015

Titartakkat: Christian Rex, Deluxus Studio



Inatsisartut Allattoqarfiat · Postboks 1060 · 3900 Nuuk
inatsisartut@inatsisartut.gl · www.inatsisartut.gl



Takorlooruk ikinngutitillu pinnguaqatigiittusi, immaqa pingasuu-
vusi sisamaallusiluunniit. Qanoq pinnguarnissarsi immaqa
isumaqatigiissutigaaarsi: Ajugaassagussi qasseriarlusi arsaq
ajuuffimmut isertissavisiuk? Attaveqaatitigut unammissutigisas-
sinni kina "kunngiussava"? Tassa naatsumik oqaatigalugu: malit-
tarisassiortariaqarpusi.



Nunatsinni aamma
taamaappoq. Inuit
56.000-it missaarlugit
amerlassusillit maani
najugaqarput. Inuit
tamakku inooqatigiissin-
naassagunik malitta-
risassanik maleruaasa-
riaqarput. Allatut
oqaatigalugu innuttaasut
tamarmik inatsinik ma-
linnittariaqarput.






Naalakkersuinermik suliallit tassaapput inatsisiliortut.
Kiami suna suliaraa?

Inatsisartoqarpugut aamma Naalakkersuisoqarpugut.


Inatsisartut inatsisiliortuupput. Inatsisit qanoq iluseqarnissaat
Inatsisartut aalajangertarpaat. Inatsisissatut siunnersuut Inatsi-
sartunit akuersissutigalugu taasissutigereepassuk taassuma ti-
mitalerneqarnissaa Naalakkersuisut isumagissavaat. Inatsisartut
inatsisiliortuupput Naalakkersuisullu atuutsitsisuullutik.

Naatsumik oqaatigalugu: Inatsisartut aalajangiisuupput
Naalakkersuisullu aalajangiussat atuutsilernissaannik isumagin-
nittuupput.


Inatsisigut Inatsisartunit suliarineqartarput, parlamentitsinnit. Nunatsinni naalakkersuinermik suliallit tassani naapittarput, inatsisillu atuuttussat tassani oqallisigalugillu taasissutigisarpaat. Soorlu kammalaatitillu naapillusi qanoq pinnguaqatigiinnis-sarsi isumaqatigiissutigigaangassiuk.



Naalakkersuinermik suliallit 31-it Inatsisartuni issiapput.
Taakku innuttaasunit qinersinermi taasisunit qinigaapput.
Kisianni qinersisinnaassagaanni minnerpaamik 18-inik ukioqale-
reersimasariaqarpoq. Taamaammat meeqqat inuusuttuaqqallu
qinerseqqusaanngillat.




Inatsisit assigiinngitsut amerlasuut naalakkersuineramik suliaqartunit oqallisigineqartarput. Assersuutigalugit: Atuarfimmi nerisaqarneq tamanut akeqassanngila? Sulinngiffeqarluta nuna-mi allameereerutta angerlamut sukkulaat qanoq annertutigisoq nassarsinnaavarput? Immiaaqqanik pujortagassanillu meeqqanut tuniseqqusaavuguut?






Oqallinnerit taakku Inatsisartut ataatsimiittarfianni pisarput. Ataatsimiinnek aallartileraangat Siulittaasoq sianinguaminik sianertarpoq. Siulittaasoq naalakkersuineramik suliaqartunit 31-init qinerneqartarpoq, taannaallunilu ataatsimiinnermik aqutsisusoq.

Naalakkersuineramik suliallit oqaaseqassagaangamik oqaluttarfimmut qaqisarput. Oqaluttarfiup tunuani timmisat marluk nivingapput, Kalaallillu Nunaata erfalasua oqaluttarfiup tunuani teqeqqumiippoq.






Inatsisissamik naamassillugu oqallisiginninneq sivirusinnaavoq. Naalakkersuineramik suliaqartut tamarmik sapinngisartik naapertorlugu oqaaseqareeraangamik, inatsit atuuttunngussanersoq atuuttunngussannginnersorluunniit taasissutigisarpaat.

Nunamik aqutsineq taamaattoq kikkut tamat oqartussaaqataanerannik (demokrati) taasarpaput. Tassalu inuinnaat naalakkersueqataanerat.

Taamaalilluni Kalaallit Nunaanni innuttaasut tassaapput imminnut naalakkersortut.


Inatsisip atuuttuunissaa tamanit aalajangiunneqarpat, tamatta
inatsisip peqqusinera malillugu pissusilersussaagut. Soorlu
aamma ikinngutitillu immissinnut taamak pisartusi:



Aalajangersimasumik malittarisassaqaarlusi pinnguarnissarsi
aalajangiukkussiuk, tamassi tamatumunnga isumaqataanissarsi
pingaaruteqarpoq.

Maanna nalorsitsaarutinnguaq misilissinnaavat!

Misilillugu apeqqutit
uku akikkit:



Inatsisit qanoq iluseqarnissaat
kikkut aalajangissavaat?

- ☐ Naalakkersuisut
- ☐ Kunngi arnap
- ☐ Inatsisartut

Naalakkersuineramik sulialittagut inatsisiliorlutik sumi
naapittarpat?

- ☐ Inatsisartuni
- ☐ Atuagaateqarfimmi
- ☐ Katersortarfimmi

Naalakkersuineramik suliallit qassit Inatsisartuniippat?

- ☐ 13-it
- ☐ 31-it
- ☐ 100-ut

Meeqqat Inatsisartunut qinersisinnaappat?

- ☐ Aap
- ☐ Naamik

Inatsisartut Siulittaasuata ataatsimiinneq ammaraangamiuk suna atortarpaa?

- ☐ Siggartarpoq
- ☐ Suaartarpoq AALLARTIGITSI
- ☐ Sianiminik sianertarpoq

Oqaluttarfiup tunuani sunik nivingasoqarpa?

- ☐ Timmissat marluk
- ☐ Aaveq
- ☐ Puisip amia immigaq

Erfalasoq sorleq oqaluttarfiup tunuani teqeqqumiippa?

- ☐ Kalaallit erfalasuut
- ☐ Danskit erfalasuut
- ☐ Erfalasoq puisimik assitalik

Inatsisissap atuuttunngornissaa atuuttuunnginnissaaluunniit naalakkersuinemik suliallit qanoq iliorlutik aalajangertarpaat?

- ☐ Taasissutigisarpaat
- ☐ Makitsissutigisarpaat
- ☐ Siulittaasup aalajangertarpaa

Kikkut tamat oqartussaaqataanerat (demokrati) qanoq isumaqarpa?

- ☐ Nuna kunngimit aqunneqartoq
- ☐ Nuna innuttaasunit aqunneqartoq
- ☐ Nuna politiinit aqunneqartoq

Nalorsitsaarummut akissutit eqqortut

1. Inatsisartut · 2. Inatsisartut · 3. 31 · 4. Naamik
5. Sianiminik sianertarpoq · 6. Timmissat marluk
7. Kalaallit erfalasuat · 8. Taasissutigisarpaat
9. Nuna innuttaasunit aqunneqartoq

